



Maniffesto er Democratiaeth a Chynaliadwyedd

Prisiwn gynaliadwyedd yn fawr: diwallu anghenion pobl ar hyn o bryd heb gael effaith andwyol ar allu cenedlaethau'r dyfodol i ddiwallu'u hanghenion eu hunain. Fodd bynnag, erbyn heddiw mae gweithgarwch pobl wedi mynd y tu hwnt i gyfyngiadau naturiol y ddaear. Fel rhywogaeth rydym wedi creu anghydraddoldebau mawr ac wedi cipio adnoddau rhag y rheini sydd heb eu geni eto.

Prisiwn ddemocratiaeth yn fawr: rheolaeth ar y bobl, gan y bobl, ac i'r bobl. Ond tansailir democratiaeth trwy benderfyniadau a wneir sy'n ddemocrataidd mewn enw yn unig. Fe'i bygythir gan wrthdaro, apathi, anghydraddoldeb, ymelwa a llygredd. Mae'n methu â sicrhau cynaliadwyedd.

Gyda'n gilydd, os awn ati ar unwaith, mae gennym y pŵer i weddnewid democratiaeth er mwyn ei gwneud yn rym ar gyfer cynaliadwyedd. Datblygwyd y Maniffesto er Democratiaeth a Chynaliadwyedd i arwain mudiad byd-eang er newid. Trwy ei lofnodi, cadarnhawn ein bod am fod yn rhan o'r mudiad hwn. Bydd yr hyn a grëwn gyda'n gilydd yn rhan o'n cymynrodd i genedlaethau'r dyfodol.

Egwyddor 1: Ar gyfer cynaliadwyedd mae angen democratiaeth lewyrchus

Mae gweddau niferus ar ddemocratiaeth. Gall wella bob amser a rhaid iddo addasu bob amser. Democratiaeth yw'r system wleidyddol orau i bobl er mwyn sicrhau amgylchedd iachus a thegwch ar gyfer pawb ar hyn o bryd ac yn y dyfodol.

Rhaid i ddemocratiaeth beidio byth â mynd yn rhywbeth ffug. Mae democratiaeth go iawn yn fwy o lawer nag etholiadau a phleidleisio: golyga hefyd fod pawb yn ymrwymo i degwch a sicrhau bod y cyhoedd yn cymryd rhan fywiog ac ystyrlon yn y broses o wneud penderfyniadau, yn enwedig y bobl sydd fwyaf ar yr ymylon. Golyga hyn gyfrifoldeb i genedlaethau'r dyfodol yn ogystal â chenedlaethau'r presennol.

Er mwyn iddi ffynnu ac adfer ei hun ar ôl ergydion ac ansicrwydd, mae angen cynorthwyo democratiaeth trwy addysg dinasyddiaeth. Rhaid hefyd wrth fesurau effeithiol i sicrhau rhyddid rhag buddiannau masnachol ac ariannol; rhyddid rhag llygredd; gwleidyddion a swyddogion cyhoeddus amrywiol ac atebol; cyfryngau rhydd ac annibynnol; tryloywder; hawl i gyfiawnder; rheolaeth cyfraith deg; barnwriaeth annibynnol; a pharch at hawliau dynol yn eu cyfanrwydd.

Ymrwymïadau

Ymrwymwn i arwain trwy esiampl; gan ddyfnhau'r broses ddemocrataidd o wneud penderfyniadau trwy'r ffyrdd yr ydym yn ymwneud â phobl, yn y byd go iawn ac ar-lein.

Anogwn ein cymunedau, ein cynrychiolwyr etholedig, yn ogystal ag arweinwyr ledled y byd i ddechrau arferion sy'n dangos ymrwymiad cadarn i ddemocratiaeth y mae pobl yn rhan ganolog ohoni.

Galwn ar arweinwyr dinesig a chynrychiolwyr etholedig i ddangos yr arweinyddiaeth sy'n hanfodol i adnewyddiad democrataidd.

Egwyddor 2: Bwrw golwg hirdymor

Rhaid i ddemocratiaeth gynllunio ar gyfer anghenion dynol ar hyn o bryd ac yn y dyfodol mewn ffyrdd sy'n parchu cyfyngiadau naturiol y ddaear. O'r lleol i'r byd-eang, er mwyn sicrhau democratiaeth ar bob lefel, mae mawr angen goresgyn agweddau byrdymor.

Ymrwymïadau

Dadleuwn y dylid datblygu a chryfhau sefydliadau a phrosesau annibynnol a ddyluniwyd i gynnwys cenedlaethau'r dyfodol a meddyliau a thystiolaeth tymor hwy yn rhan o'r prosesau gwleidyddol o'r lleol i'r lefel fyd-eang.

Trwy ein dinasyddiaeth weithredol ar bob lefel, down yn eiriolwyr i genedlaethau'r dyfodol.

Egwyddor 3: Rhaid i gynaliadwyedd fod yn nod canolog i lywodraethau ym mhob man

Mae angen i ddemocratiaeth yrru'r economi, yn hytrach na'r ffordd arall. I sicrhau hyn, rhaid i lywodraethau ar bob lefel wneud cynaliadwyedd yn nod canolog. Er mwyn sicrhau cynaliadwyedd, rhaid gweddnewid modelau economaidd sy'n arwain at ddistrywio'r amgylchedd ac sy'n agor bylchau enfawr rhwng y cyfoethocaf a'r tlotaf. Mae angen i bob sector mewn cymdeithas ymroi i'r broses newid hon.

Ymrwymïadau

Anogwn lywodraethau a chyrff cyhoeddus i fabwysiadu mesurau cynnydd sy'n prisio tegwch, lles a'r amgylchedd.

Anogwn lywodraethau a chyrff rhyngwladol i wneud cynaliadwyedd yn egwyddor ganolog ar gyfer trefnu polisiau.

Cefnogwn fentrau cymdeithasol ynghyd ag arloesed sy'n gwneud datrys problemau amgylcheddol a chymdeithasol yn fwy o flaenoriaeth na gwneud elw.

Cefnogwn dryloywder llawn wrth ariannu pleidiau ac ymgeiswyr gwleidyddol a chamau i ddileu dibyniaeth ar fuddiannau cymdeithasol a chorfforaethol.

Ymrwymwn i ffyrdd o fyw sy'n dangos ein hawydd i flaenoriaethu camau i sicrhau amgylchedd iach a thegwch i bawb, ar hyn o bryd ac yn y dyfodol.

Egwyddor 4: Rhaid i addysg gysylltu dinasyddiaeth a chynaliadwyedd

Rhaid i addysg feithrin y wybodaeth a'r gwerthoedd sydd eu hangen ar gyfer cryfhau camau democrataidd ar gyfer cynaliadwyedd. Rhaid iddo rymuso pawb, o ba oed bynnag, i fod yn weithredol fel dinasyddion a dilynwyr, ac yn ddoeth fel arweinwyr. Rhaid iddo helpu i agor y potensial o fod, yn hytrach na chael.

Dylai pawb, o fore oes, allu manteisio ar addysg sy'n adeiladu'r sgiliau a'r wybodaeth i lunio democratiaeth er mwyn iddi sicrhau amgylchedd iach a thegwch i bawb.

Ymrwymadau

Cefnogwn addysg ddinesig sy'n datblygu dinasyddion gweithredol ac sy'n creu dealltwriaeth ddofn o'r achos o blaid democratiaeth a'i harferion mewn gwahanol gyd-destunau. Dadleuwn o blaid rhaglenni cadarn ar gyfer addysg gydol oes ym maes cynaliadwyedd.

Egwyddor 5: Rhaid i wybodaeth fod yn gynhwysol

Mae gan bob dinesydd yr hawl a'r cyfrifoldeb i gael gwybodaeth.

Rhaid parchu gwybodaeth a doethineb sy'n deillio o brofiad ymarferol i'r un graddau â gwybodaeth a achredir yn broffesiynol.

Rhaid i brosesau cyhoeddus ar gyfer trafod cyngor a thystiolaeth sy'n seiliedig ar wybodaeth fod wrth wraidd y penderfyniadau cyhoeddus a wneir o'r lleol i'r byd-eang.

Ymrwymadau

Cefnogwn fentrau sy'n anelu at gynnwys barn a phwyso a mesur gan y cyhoedd yn y prosesau gwyddonol rhyngwladol, cenedlaethol a lleol ynghyd â phrosesau eraill sy'n llywio'r penderfyniadau a wneir wrth fynd i'r afael â heriau ym maes cynaliadwyedd.

Ymrwymwn i godi llais pan welwn fod cynrychiolwyr etholedig a swyddogion cyhoeddus yn rhy ddibynnol ar arbenigedd gan weithwyr proffesiynol ar draul gwybodaeth gan y rheini y mae eu harbenigedd yn deillio o'u profiad.

Egwyddor 6: Dim amdanom ni hebom ni

Yn y gymdeithas fyd-eang sydd ohoni, gall penderfyniadau a wneir ar unrhyw lefel effeithio ar bobl yn unrhyw le ac ym mhobman. Mae angen cymryd i ystyriaeth fuddiannau pawb yr effeithir arnynt gan benderfyniadau cyhoeddus. Dylai'r rheini sy'n gwneud penderfyniadau ar bob lefel hefyd fod yn atebol i bob un yr effeithia eu penderfyniadau arno.

Rhaid bod modd i gymunedau fanteisio ar y lleoedd a'r adnoddau y mae arnynt eu hangen ar gyfer gwneud penderfyniadau er mwyn llunio eu dyfodol eu hunain, gan roi ystyriaeth briodol i les eraill, cenedlaethau'r dyfodol a ffiniau naturiol y ddaear.

Cymaint yw graddfa ac effeithiau heriau cynaliadwyedd yn aml nes bod rhaid i ddemocratiaeth orlifo o'i ffiniau cenedlaethol. Wrth wneud penderfyniadau ar lefel ryngwladol, democratiaeth, yn hytrach na hunan-les llywodraethau unigol neu grwpiau o lywodraethau, a ddylai fod wrth wraidd yr ymwneud.

Ymrwymïadau

Cefnogwn fentrau i gynyddu ymwybyddiaeth gyhoeddus o ryng-gysylltedd pobl a natur, ac sy'n cynyddu pwysigrwydd systemau a ffiniau naturiol wrth wneud penderfyniadau democrataidd. Cefnogwn fentrau ar bob lefel i gryfhau penderfyniadau a chyfranogiad democrataidd pawb yr effeithir arnynt, a chynrychiolaeth y rhain, gan gynnwys y rheini nad ydynt wedi cael y bleidlais, er enghraifft plant, ffoaduriaid neu bobl mewn gwledydd eraill.

Cefnogwn y camau i greu Cynulliad Seneddol y Cenhedloedd Unedig yn gam cyntaf at system o ddemocratiaeth fyd-eang.